

Vuk'uzenzele

O e tlisediwa ke Ditlhaeletsano tsa Puso (GCIS)

English/Setswana

Ferikgong 2023

NSFAS e thusa bašwa gore ba fetole matshelo a bona



Owen Mngadi

Bongumenzi Mvelase o tla diragatsa ditiro tsa gagwe tsa fa e sale e le mosimanyana tsa go nna rramolao wa maemo a a kwa godimo morago ga gore a tlamelwe ka thuso ya matlole. Mošwa yono wa dingwaga di le 22 yo ga jaanong a dirang ngwaga wa boraro kwa Yunibesiti ya Bokone Bophirima (NWU) o thusitswe ka matlole ke Sekema sa Naga sa go Thusa Baithuti ba Ditheo

tsa Thuto e Kgo-lwane ka Matlole a go ya Sekolong (NSFAS). Mvelase yo a tswang kwa Utrecht kwa porofenseng ya KwaZulu-Natal, ga a sa na batsadi ba gagwe ka bobedi mme o godisitswe ke koko le ntatemo golo wa gagwe. Ka bomadimabe le bona ba ne ba ikela badimong fa a ne a le mo Mophatong wa bo 10, mme seno se ne sa mo gapeletsa gore a fudugele kwa Gauteng go ya go nna le ba bangwe ba losika mme ke koo ko a weditseng dithuto tsa gagwe tsa materiki.

Le fa maemo a ne a le jalo, Mvelase a re o ne a tswela kakatlela toro ya gagwe mme a ntsha ga tshwene mo dithutong tsa gagwe mme a fitlhelela dipholo tse di mo kgontshang go ka tswela dithuto kwa yunibesiti. Go ya ka dipholo tse di beilweng tsa go ithutela Dithuto tsa Tekerii ya go Dira ka Molao kwa NWU, Mvelase o ne a iponela dipholo tsa maemo a botlhano (60–69%) mo dithutong tsa English le Isizulu mme a iponela dipholo tsa maemo a boraro (40–49%) mo dithutong tsa dipalo. Palo ya maduo a dirutwa tsotlhe tsa gagwe fa a kopane a a dirisediwang go amogelwa kwa yunibesiti - ntle le a serutwa sa dithuto tsa botshelo - a ne a fitlha mo go 32. Mvelase a re selo se se mo neileng maatla a gore a se ithoboge mo ditrong tsa gagwe tsa go nna mmueledi ka letsatsi le lengwe ke kemonokeng eo ba losika la gagwe ba mo neileng yona mmogo le barutabana ba gagwe. mme o ne a tia mooko go tswa letsholo la go batlana le thuso

ya go ka mo duelela dithuto tsa gagwe. Ka le lengwe la matsatsi a go abela barutwana ka tshedimosetso ya ditiro tse di farologaneng o ne a utlwela ka NSFAS mme o ne a dira kopo mo go bona kwa bokhutlhong jwa ngwaga yo a gareseng dithuto tsa gagwe tsa materiki ka ona. A re o ne a fitlhela gore thulaganyo ya teng e bonolo thata mme ga a ke a kopana le dikgwetlho fa a goroga kwa yunibesiti mo ngwageng wa gagwe wa ntlha. A re NSFAS e ne ya mo tlamela ka tsotlhe tse a di tlhokang jaaka e duelelela dithuto tsa gagwe, lefelo la moo a nnang mo go lona, e mo naya madi a go reka dibuka mmogo le go mo naya madi a go ithekela dijo a a kana ka R1 500 kgwedi e nngwe le e nngwe. A re go nna yo mongwe wa bao ba thusiwang ke NSFAS e nnile selo se se mo rolang mathata gonno o ne a itse gore se a se tlhokang fela ke go ntsha ga tshwene mo dithutong tsa gagwe mme a se tlhole

a ikopisa tlhogo ka gore o tla bona kae madi a go ya sekolong. A re o a tle a boloke a mangwe a madi a ba mo neelang ona a go reka dilo tse a di tlhokang mme a a dirise go ya gae kwa KwaZulu-Natal fa dikolo di tswaletse. Le fa ka fa letlhakoreng le lengwe a itse gore kgakala ke koo a santseng a ya pele e ka nna mmueledi, o itumelela gore go sengwe se a setseng a simolotse go se dira go fitlhelela seo. "Go ne go na le dinako dingwe o fitlhole ke ipotsa gore tota fa ke sena go garela dithuto tsa me tsa materiki ke tla ithutela eng gonno go ya yunibesiti go tlhokega madi, ka jalo ke leboga gore NSFAS e tsentshitse letsogo go fitlha mo ke leng ga jaana, le fa tota kgakala e santse e le koo ke lebileng gona," o tlhalositse jalo. Fa a tlhalosa gore goreng a tsere tshweetso ya go ithutela se a ithutetseng sona ga jaana, Mvelase o tlhalositse gore o lemogile a santse a le monnye gore ga se batho botlhe ba ba kgonang go duelela ditirelo tsa boramolao mme o batla go fetola seno fa a sena go tlhoma kgwebo ya gagwe ya babueledi. O batla go nna mmueledi yo a direlang

E tswela mo go tsebe 2

Packhouse changes local farmers' fortunes

Page 7

Maarman ready to be seen through photography

Page 10

Go buisa Vuk'uzenzele tsenya epe ya GOVAPP e o ka e fitlhelang mo go:

Available on the App Store

Morago o batle SA Government mo go Google playstore kgotsa mo go appstore

IKGOLAGANYE LE RONA MO GO

Diwebesaete ke: www.gcis.gov.za Imeile ke: vukuzenzele@gcis.gov.za

www.vukuzenzele.gov.za Mogala ke: (+27) 12 473 0103

Tshedimosetso House: 1035 cnr Francis Baard and Festival streets, Hatfield, Pretoria, 0083

E tswela go tswa mo go tsebe 1

ditheo tsa ditshwanelo tsa batho gore a kgone go thusa batho ba gaabo, segolobogolo mo mererong e e jaaka pusetso ya dinaga, mme o tlhalosa gore ntlha eno ga go ise go simololwe go samaganwa le yona mo motseng oo a tswang kwa go ona.

A re yunibesiti e fetotse botshelo jwa gagwe. O kopane le batho ba ba mo neileng maatla ba ba ka kgonang go mo tswa thuso gore a fitlhelele seo a batlang go se fitlhelela.

“Ke nnile le seabe mo ditiragalong di le dintsi tse di nthusitseng gore ke tlhologanye go le gontsi ka seo ke ithutelang sona. Ke tsamaile ke kopana le batho bao ba dirang bontle tota mo tirong eno; ke selo se se itumedisang,” o tlhalositse jalo.

Go ema baithuti nokeng

Mvelase o rotloetsa bao ba batlang go tswela dithuto tsa bona mme ba sena madi a go ya sekolong gore ba dire dikopo mo go NSFAS gore ba kgone go fitlhelela

ditoro tsa bona.

Le fa go le jalo, o lemosa batho gore baithuti ba ba tswang kwa malapeng a a dikobodikhutshwane mo go bona go a tle go nne boima fa e le gore ba tswa kgakala le koo ba tsenang sekolo teng gonne ba kgakala le magae a bona. O tshwenngwa gape le ke baithuti ba bangwe ba ba jaaka ene ba ba tlogelang sekolong ka ntlha ya fa ba sa dire sentle mo dithutong tsa bona. O tlhalosa gore go botlhokwa gore baithuti ba ba iku-tlwang go le boima mo go bona kwa sekolong gore ba

sole mosola ditirelo tsa go ba thoba maikutlo tse di leng teng kwa diyunibesiti tse ba tsenang mo go tsona.

O tlhalosa gore e nngwe ya ditlhokwa tse baithuti ba tshwanetseng go tsamaisana le tsona tsa NSFAS gore e tswela go duelela dithuto tsa bona ke gore ba tshwanetse go falola dithuto tsa bona.

“NSFAS e thusitse batho ba bantsi mo setšhabeng sa rona ba ba tswang mo malapeng a a dikobodikhutshwane. Nka rotloetsa botlhe ba ba tlhokang thuso go dira dikopo tsa bona

nako e santse e le teng mmogo le go dira ka natla gore ba kgone go iponela dipholo tse dintle tse di ka ba kgontshang go ithutela sengwe le sengwe se ba batlang go ithutela sona.

“Re tshwanetse go tlhologanya gape gore le fa go bonagala e kete ditirelo tseno ke tse di sa duelelweng, ga go jalo, go mongwe yo madi a a re isang sekolong a gogiwang mo go ene ka go duedisiwa lekgetho. Ka jalo, ga re a tshwanela go a dirisa botlhaswa,” o tlhalositse jalo. **U**

More Matshediso

Le fa e le gore le-tlha la bofelo la go tsenya dikopo tsa go tlamelwa ka matlole a go ya sekolong kwa Sekemeng sa Naga sa go Thusa Baithuti ba Ditheo tsa Thuto e Kgolwane ka Matlole a go ya Sekolong (NSFAS) e le ka la bo 31 Ferikgong 2023, seke-ma seno se eletsa badi-radikopo gore ba tsenye dikopo tsa bona gona jaanong ba se re ba letetse go di tsenya fa letlha leno le setse le atumetse.

NSFAS e thusa baithuti ba ba tswang kwa malapeng a a iponelang letseno le le ka fa tlase ga R350 000 gore ba kgone go tswela dithuto tsa bona kwa diyunibesiting tsa puso mmogo le kwa dikholejeng tsa Katiso le Thuto ya Ditiro tsa Diatla le tsa Setegenik (di-TVET).

Go ya ka NSFAS, batho bao ba dirang dikopo ba tlamelwa ka matlole a go ikwadisa, a go duelelwa dithuto, madi a go ithekela dijo; go duelelwa madulo kgotsa go duelelwa dipalangwa; madi a go ithekela dibuka; mmogo le a go ithekela dilwana tsa go itlhokomela.

Gore o bone thuso ya basari ya NSFAS o tshwanetse go bo o le moagi wa Aforika Borwa yo a batlang go ya sekolong ka ngwaga wa 2023 kgotsa fa e le gore o setse o le mo sekolong kwa yunibesiti ya puso kgotsa

Dira kopo ya go thusiwa ka matlole a NSFAS pele letlha la bo 31 Ferikgong 2023 le garela!

kwa kholejeng ya TVET.

Dilo tse di tlhokagalang

O tla bona thuso ya matlole:

- Fa e le gore o yo mongwe wa batho ba ba amogelang megolo ya Setheo sa Tlhokomelo ya Baagi sa Aforika Borwa (SASSA), kgotsa
- O le motho yo a nang le bogole, mme mogolo wa lapa fa o kopanngwa ga o a tshwanela go feta R600 000 ka ngwaga kgotsa
- O tsena sekolo mme o falotse bontle.

O dira jang kopo kgotsa o ikwadisa jang?

Gore o kgone go dira kopo ya go tlamelwa ka matlole, o tshwanetse go ikwadisa mo akhaontong ya @myNSFAS ka go tsena mo webesaeteng ya teng mme o latele dikgato tse di latelang:

- Etela www.nsfas.org.za
- Tobetsa konopi ya myNSFAS kwa godimo mo letlhakoreng la moja.
- Tlatsa dintlha tsa gago fela jaaka di tlhagelela mo lekwaloitshupong la gago.
- Tlatsa dintlha tse di maleba tsa gago tse go ka ikgolagangwang le wena ka tsona (NSFAS e tla dirisa

dintlha tseno go ikgolaganya le wena mabapi le dintlha tse di botlhokwa tse o tlhokang go di itse ka kopo ya gago).

- Dumelana le melao le melawana ya bona ka go tobetsa mo le-bokoswaneng le le tlhagelelang. Ga go na gore o ka kgona go tswela pele ka kopo ya gago fa o sa tobetsa lebokoswana leno mme ka go tobetsa mo go lona go tla naya NSFAS tetla ya gore ba ka tswela ba tlhotlhomisa boammaruri jwa dintlha tse o neelaneng ka tsona.
- Tsenya lefoko la sephiri la go dirisa akhaonto ya gago gore ka lona go se nne le bao ba tsenang mo akhaontong eo, mme morago o boeletse lefoko leno gore ke lona fela le o tla le dirisang go tsena mo akhaontong mme fa o feditse o tobetsa konopi e e kwadileng 'CREATE'.
- Mo sekerining go tla tlhagelela molaetsa o o go netefaletsang gore o kgonne go bula akhaonto.

“Gakologelwa go boloka dintlha tsa gago ka tshwanelo mmogo le lefoko la sephiri la go dirisa akhaonto ya gago gore dintlha tsa gago tsa boitshupo di se wele mo diatleng disele kgotsa akhanto ya gago e se tsenwe ke batho ba o sa ba

itseng le go utswiwa,” ga rialo NSFAS.

NSFAS e tlaleleditse gape le ka gore bao ba dirang kopo ba tshwanetse go ntsha matlho dinameng ba se tsene mo diwebesaeteng tse di butsweng ke batho tse di itirang webesaete ya NSFAS, jaaka batho bao ba butse diwebesaete tseo ka ma-itlhomu a go utswa dintlha tsa boitshupo tsa batho ba bangwe.

Batho ba ba tsenyang dikopo ba tshwanetse ba bo ba na le ditokomane tse di latelang:

- Khophi ya Lekwalo-itshupo/Lekwalo la Matsalo
- Khophi ya Lekwalo-itshupo la batsadi/la batho ba ba go godisang/la motho yo o nyalaneng nae
- Fa e le gore o dirisa Karata ya Boitshupo o tshwanetse gore fa o dira khophi o gatisa matlhakore otlhe a yona
- Bopaki jwa mogolo (fa go tlhokagalang)
- Batho ba ba nang le bogole ba tshwanetse go tlatsa foromo ya *Annexure A*, e o tla e fitlhelang mo webesaeteng ya NSFAS
- Fa e le gore go ya ka Lefapha la Thuso ya Baagi o kwadisitswe mo go lona jaaka ngwana yo a tlhokang thuso, o

tshwanetse go romela kwa go NSFAS foromo e e tlatsitsweng ya Bopaki jwa gore o Ngwana yo a Tlhokang Thuso ya Puso e e tlatsitsweng ke Motlhankedi wa Thuso ya Baagi

- Fa e le gore mo kopong ya gago o tlhalositse gore ga o na wa lelapa yo o ka kwadisang dintlha tsa gagwe kgotsa ga o na lekwalo la matsalo le le tlhagisang dintlha tsa batsadi, o tla tshwanelwa ke go tlatsa foromo ya bopaki jono: Yona ga se ya SASSA.

“Fa o sena go ikwadisa webesaete e tla go romela lenaneo la ditokomane tse o tshwanetseng go di tsenya mo kopong ya gago gona mo webesaeteng,” ga rialo NSFAS. **U**

Go bona tshedimotsetso ka botlalo etela webesaete ya www.nsfas.org.za kgotsa o ikgolaganye le bona mo go @myNSFAS ka Twitter, mo go MyNSFAS ka Instagram kgotsa mo go National Student Financial Aid Scheme ka Facebook.



government communications

Department: Government Communication and Information System
REPUBLIC OF SOUTH AFRICA

Tel: 012 473 0353

Email: vukuzenzele@gcis.gov.za

Address: Private Bag X745, Pretoria, 0001

Head of Editorial and Production

Regomoditswe Mavimbela
Regomoditswe@gcis.gov.za

Acting Editor-in-Chief

Zanele Mngadi | Zanelemngadi@gcis.gov.za

Acting Managing Editor

Tendai Gonese | tendai@gcis.gov.za

News Editor

Noluthando Motswai

Writers: More Matshediso

Graphic Designers

Tendai Gonese | Benny Kubjana

Production Assistants

Jauhara Khan | Sebastian Palmer

Language Practitioners

Nomgcibelo Motha | Boitumelo Phalatshe
Thandolunye Khulu | Mahanyele Ramapala



Vuk'uzenzele
is published by Government
Communications (GCIS)

Distributed by:
ON THE DOT

Printed by:
RISING SUN PRINTERS

The material in this publication may be reproduced, distributed, or transmitted in any form or by any means, including photocopying, recording, or other electronic or mechanical methods, without the prior permission of the publisher on condition that this publication shall be credited as the source.



Mo nageng ya Aforika Borwa re tshwanetse go ipela le go itumelela go nna le bobegakgang jo bo sa ilediweng go dira tiro ya jona

Kgaso ya dikgang ka makwalodikgang ke e nngwe ya dilo tse di botlhokwa tse re nang le tsona mo pusong ya rona ya temokerasi, mme gape ke yona e bontsi jwa rona re sa e tseeleng tlhogong.

Ka fa nageng ya Aforika Borwa, mo dingwageng tse di sa feteng di le 45 tse di fetileng tiro ya bobegadikgang e ne e bonwa jaaka eo e phuganyang puso ya mo malobeng.

Fa re lebelela ka fao dilo di fetogileng ka gone fa e sale puso ya temokerasi e simolola go busa re latela ditaelo tsa ka fao maemo a botshelo a fetogileng go ya ka maemo a go lokologa ga bobegakgang a a phasaladitsweng mo go *Reporters without Borders* (RSF).

Mo pegelony ya naga e nngwe le e nngwe kwa tlase moo e felelang gone go na le tshedimosetso e e tlhalosang ka botlalo dikgato tse naga e e rileng e gatelelang ka tsona babegadikgang.

Fa o akanya fela ka gore mo ngwageng ono o le esi fela go setse go bolailwe babegadikgang ba le 45 mme batlhankedi ba bangwe gape ba le bane ba ba direlang ditheo tsa bobegakgang le bona ba setse ba bolailwe mo mafelong a a farologaneng mo lefatsheng ka ntlha ya tiro eo ba e dirang. E bile gape mo go ona ngwaga ono go golegilwe babegadikgang ba le 207 mmogo le batlhankedi ba bangwe gape ba le supa ba ba direlang ditheo tsa bobegakgang.

Mo nageng ya Aforika Borwa ga go mmegadikgang ope yo mo ngwageng ono wa 2022 a bolailweng ka ntlha ya go dira tiro ya

gagwe e bile gape ga go le yo a tshwaretsweng selo seo. Go ne go le fela jalo le mo ngwageng yo o fetileng, mo ngwageng wa pele ga yo o fetileng le mo mengwageng e mengwe e e fetileng.

Se ke sesupo sa gore bobegakgang jwa rona bo dira tiro ya jona ntle le go kgorelediwa e bile gape ke sesupo sa gore temokerasi ya rona ke ya boammaruri.

Gore babegakgang ba rona ba kgona go dira tiro ya bona go se sepe se ba se boifang ke selo se re ka ipelang tota ka sona. Ka fa nageng ya Aforika Borwa bobegakgang bo kgona go gasa le go phasalatsa, e bile gape tiro ya bobegakgang e diriwa go ya ka melao e e farologaneng go tshwana le Molao wa Bobegakgang.

Bobegakgang jwa makwalodikgang go na le tsela eo ka yona bo begang ka yona dikgang tse di tseewang jaaka tse di botlhokwa tota.

Go na gape le tsela ya go kwala ka dikgang tse di botlhokwa, dikgang tse di buang ka batho mmogo le ya go bua ka batho ba ba itsegeng mo setshabeng jaaka ba ba tumileng le boradipolotiki.

Jaaka ke le tlhogo ya puso, le nna letsatsi le lengwe le le lengwe go begiwa dikgang tsa mefutafuta ka nna. Gore gangwe le gape Moporesidente go tla tswelwa go buiwa ka ene mo bobegakgangyeng ke selo se re itseng gore se tla tswelwa go nna teng mme ke tla tswelwa go tsaya seno jaaka selo se se nkagang.

Bobegakgang jo bo sa ilediweng go dira tiro ya jona ke selo se se tsamaisanang le temokerasi mme e bile gape ke selo se rotlhe re tshwanetseng go dira bo-

nnete jwa gore ga se re sutlhe mo diatleng.

Re tshwanetse go dira seno bogolosegolo fa re bona maiteko a go dirisa inthanete le mafaratlhatlha a ditlhaeletsano go kgotlha bobegakgang ka monwana mo leitlhong, go bo tshosetsa kgotsa go leka go bo kgaoletsa go ntsha mosi ka sekhumelo. Re bone seno bogolosegolo mo pakeng ya fa puso e ne e gogiwa ka nko.

Se segolo se se neng se re tshwenya ke ditiro tsa go tlhasela babegadikgang ba basadi mo mafaratlhatlheng a ditlhaeletsano, mo ba neng ba kgariediwa le go tlhabiwa ka mafoko a go ba gopotsa gore bona ke basadi mmogo le go ba tshosetsa le ka gore ba tla ba betelega.

Ka ntlha ya maemo a go re jesa ditlhong a re fetileng mo go ona mo malobanyaneng fano, re tshwenngwa ke go bona e kete ditiragalo tseno di simolola go ipoeletsa gape jaanong mo inthaneteng mme di lebiwa kwa babegadikgangyeng ka fa nageng ya rona.

Go tshwarwa makgwakgwa ga babegadikgang ba bantsi mo lefatsheng ke selo se rona mo nageng ya Aforika Borwa re sa tshwanelang go se letla gore se diragale. Bobegakgang bo na le seabe se se botlhokwa se segolo mo go direng bonnete jwa gore batho mo temokerasing ya rona ba rwala maikarabelo, ka jalo rotlhe re tshwanetse go ema ka lefoko le le lengwe fa go na le maiteko a go tshosetsa bobegakgang kgotsa go bo thibela gore bo se ntshe musi ka sekhumelo.

Le fa tota go na le dilo tse dintle tse re di fitlheletseng fa go tla mo go se kgane-

tseng bobegakgang go dira tiro ya jona, monongwaga re bone naga ya rona ya Aforika Borwa e tswa mo maemong a yona e wela kwa tlase ka magato a le mararo go tswa mo go a e neng e le mo go ona mo ngwageng wa 2021 mo go *RSF World Press Freedom Index*.

Go na le dilo di le dintsi tse di dirang gore go nne le bobegakgang jo bo sa ilediweng go dira tiro ya jona. Go babalesega ga babegadikgang ke e le nngwe fela ya dilo tseno; go na le dilo di le dintsi tse di jaaka maemo a sepolutiki le a ikonomi, leano la go tsamaisa tiro le le mo molaong mmogo le maemo a setshaba le setso. Lenaneo leno le tlhalosa gore kgang ya gore fa baagi ba batla dikgang tsa maemo a a kwa godimo ba tshwanelwa ke go duelela ke e nngwe ya dikgoreletsitse tse di tsamaisanang le maemo a ikonomi, matsapa a a nnileng teng mo go emeng nokeng ka matlole ditheo tse di potlana tsa bobegakgang ka ntlha ya leroborobo la *COVID-19* mmogo le matsholo a go tlhasela babegakgang mo inthaneteng ka go ba senya leina mo mafaratlhatlheng a ditlhaeletsano a a fetlhiwang ke mekgatlho ya dipolotiki.

E nngwe gape ya dilo tse di kgoreletsang tiro ya bobegakgang e seng fela ka fa nageng ya Aforika Borwa mme le mo lefatsheng ka bophara ke ditiragalo tsa go bega dikgang tsa maaka.

Ditiragalo tsa go gasa le go bega dikgang tsa maaka mo inthaneteng mmogo le go gasiwa gape le ke ditheo tsa bobegakgang ke selo se se re tshwenyang. Tshenyo

e e fetlhiwang ke seno ke e kgolo thata mo e fetang ya go aketsa feela batho ba ba itseelang ka tsebe dikgang tseo.

Re iponetse ka matlho a rona maatla a maaka ano a nang le ona ka ngwaga wa 2021 mo kgwedding ya Phukwi fa go ne go runya ditshupetso mo mafelong a le mantsinyana ka fa nageng, fa dikgang tsa maaka di ne di gasiwa mme tsa dira gore tshakgalo mo baaging e tuke malakabe mme tshakgalo eno e ne ya dirisiwa go dira gore batho e nne seoposenngwe mme ba tswe ba ye go dira tshenyo e e seng kana ka sepe.

Fa maemo a le jaaka a le mo dikgang tsa maaka e leng ntletsentletse, re tlhoka go oketsa ditheo tsa bobegakgang e seng go di fokotsa.

Selo se le esi se se tla lwantshanang le go fetlhiwa ga dikgang tsa maaka ke go oketsa le go godisa ditheo tsa bobegakgang jo bo tshepagalang. Selo se le esi se se tla lwantshanang le tiro ya bobegakgang jo bo tsayang letlhakore la boradipolotiki le 'go phutlhamisa ba bangwe' ke babegakgang ba ba katisitsweng sentle ba ba lebelaneng fela le selo se le sengwe e leng go ruta le go neela baagi tshedimosetso ya nnete.

Ka jalo puso le lekala la poraefete ka bobedi go ikuelwa mo go bona go diragatsa maikarabelo a bona mo go direng gore go nne le bobegakgang jo bo sa ilediweng go dira tiro ya jona ka go dira gore ditheo tsa jona di se phutlhamise ka go dira bonnete jwa gore ba sola mosola ditheo tseno ka go romela kwa go tsona dipapatso tsa bona, ka go ba neela tshedimosetso ya bona le ka go thusana le bona ka ditiro tse di rileng.

Re akgola babegakgang ba naga ya rona ba ba dirang ka natla, barulaganyi ba ditheo tsa bobegakgang ba naga ya rona mmogo le badiredi ba bangwe ba ditheo tsa bobegakgang ba ba tswelwang go dira tiro ya bona e e botlhokwa ka tshwanelo mo go tlameleng naga ya rona ya temokerasi ka ditirelo tsa bona. **U**